



西齋已巳詩

興化王仲儒景州著

黃岡韋 載斧衣  
同里吳元復顧存 選

元日

雪雲散野寒仍重星斗迴天日又元  
衰暮只驚新曆換團樂不似老親存  
眼中書劍他鄉物畫裏冠裳異代恩  
預恐高軒駐荒徑早呼稚子閉閒門  
維舟昨拂敝衣塵幾日嚴寒歲序新  
鴻雁影迷連嶂雪管簫聲動滿城  
春書投澤國函將裂酒出山

鄉味不醇舉眼尚看兒女侍此心偏覺弟兄親時  
舍弟在青陽

題卓火傳傳經堂兼贈

聲名疇昔振金臺隔歲烟帆江外來齒髮過衰才  
識面爭教今夕不心開

十世先公漢侍郎曾籌燕社改南邦太常不贊洪  
都議翻把王師付九江惜黃公任景隆也

殉節孤臣烈至今江流鍾阜並高深文孫莫振青  
冥翅記取忠貞異代心

紹庭累葉父兼師六籍兒孫盡日披似向君家聞  
眇論商周之際薄微箕

三世弓箕盡臥龍鳳毛今日陋超宗傳經堂上先  
生像一樣衣冠故國容

故劍遺編本大儒崑嵒東序列球圖白頭臙臘楹  
間拜此是垂髫十歲孤

遣懷

客亭遷次逼春寒隨意駐驂映日看香在市中梅  
未買水懸牕外雪初殘夜燈每下三聲漏晚食真

分一片肝起步閒庭盼霄漢從來鳥道不爲難  
數聲江雁北風聞閒傍堂屏悵隔羣瀾漫泥塗融  
積雪傳呼車馬過浮雲更無當路能分祿空向殘  
編自策勲僮僕狐疑倒餅粟驚看珠顚落紛紛

挽黃節婦余氏

嘻悲乎少所無兩鴛鴦永獨棲焉有兒女啼我傍  
我辰日月纏冰霜一生未見三春光稱未亡告尊  
章事有不可爲豈必恩難忘斷髮納棺中明我無  
他腸植遺孤強飲食涕下如縷縻孤兒旋旋繞母

膝下泉臺怨耦來東流却西南山崩摧從一之心  
那可迴

吳雲逸招集郊園看梅

西郊是處酒旗青遠興邀人到野亭深院竹開風  
恰靜晴天花潤雨纔零百壺未必乾春釀雙漿還  
應撥夜星醉把繁枝默惆悵幸分清影慰伶俜

李詞臣兄弟招看梅舍弟至自青陽

君家池館往還頻二月天陰亂石新名酒細傾愁  
裏夜濃花深放雨中春江山夢醒逢歸客貧老歡

增愧主人別向書齋步檐際不教疎藥對傷神

送別舍弟歸里

楚雁驚春盡北飛飄空巢燕認荆扉近家不得同  
舟去垂橐翻教帶病歸文愈頭風堪勿藥遯占尾  
厲獨難肥多時朋舊烟波外落日銜杯事總違

三日作

今年春又暮江城花亂開氣候入暄妍風光自徘徊  
連宵靈雨零飄盡中園梅晴暉啓元巳初晨散  
陰霾我行將安之碧水城南隈柳岸青忽深衆鳥

亦喈喈畫船簾半約玉質垂瓊瑰如斯艷陽天美人  
豈無懷含意欲通辭左右多鳩媒思憑微波託  
蕩漾已復乖揮手一長吟浩然歸去來

皇帝南巡歌

波平禪海日光輝臯益何須補舜衣紫禁沉沉雙  
鳳跂青旂旆旆六龍飛

絳節朱干捧玉輿蒼龍南下屬春初 天王稽古  
行時令集鳳羣公省諫書

正供憶昨賜江鄉歌舞窮簷化日長一詔又蠲三

百萬逋逃乾沒謝 君王

烟花江介數揚州記得隋家有舊樓馬到棲靈停  
轡望無邊芳草六朝留

夾日天垂錦繡文交橫靈瑣白紛紛春官遍向行  
人說此是 皇家五色雲

斜插黃旗雜隼旗網船男女笑軒渠府官檄我來  
隨 駕楊子江心要打魚

瓜洲浮玉插江山金碧丹青白浪間蜃穴鮫潭多  
怪物潛鬢戢尾避 龍顏

翠嶂重重樹影斜雪雲水月亂交加館娃宮是靈  
巖寺越女身非鄧尉花

六橋桃李是新栽浥露含風尚未開報道東皇催  
速放 官家已過秀州來

陽侯屏翳兩難懲已溺思同四載乘莫訝下河曾  
未到旅平親祝禹王陵

鍾陵隧道上朝暎五等前驅七校奔異代龍衣來  
拂地都梁真主到今尊

岳牧諸曹奉 主歡燈船江口似龍蟠 至尊別

有移情處古寺西園竹數竿

元宵已過欲清明龍艦南還只數程九市花燈重  
照耀香車紅袖滿層城

留駕紛紛出近關商人也自列朝班 聖皇不戀

烟花國一夕江都萬乘還

閏三日朱其恭招飲

東陽公子劇多情昨夜邀人自出城頭白忽逢雙  
上已踏青翻怨一清明蘭芳采去波猶綠榆莢飛  
來草漸平好是風光行復住深杯端合爲君傾

李回臣餉鮓魚

海曲腥風起鮮魚已上村味堪爭蟹鉞膈豈類熊  
蹠淡泊春先飯提攜晚到門分甘非細故落筯念  
相存

飲劉叔載宅

高館荒亭若比鄰斜陽相對自清晨驅愁又盡今  
宵興縱酒還須我輩人暮鼓嚴城休促漏江天閨  
月正賒春閒留博進酬風日作樂從君計畫新

送吳聽翁遊黃山

龍潭月窟天邊路曾擬凌霞策杖尋酒半看君增  
矍鑠春殘別我去登臨峰峰笋插哀猿隊面面松  
盤老鶴深料得題詩人境外故園風景百年心

立夏前三日同鄭若干諸子汎舟

郭門移棹日初斜水迳船交礙淺沙數往忽驚餘  
節候歸奇真借此年華綠楊野店還登岸紅藥諸  
園未吐花倚賴江天朋好在令人着處得爲家

盛先振亦仁兄弟招看海棠

去年此時西隣家一株紅艷開相向醉後題詩憶

杜公寫在隣家雪色障今年邗上滯孤踪江郭春  
光日更濃蘭梅桃杏滿街賣出門便與園丁逢清  
明已過天少雨市上海棠纔半吐低垂細瑣不足  
言苦憶西家舊西府欵扉誰送赫蹏書朝來邀我  
就其居盛家兄弟年最少書齋木石爭縈紆主人  
溫溫隸人肅引客沉沉歷華屋翠幌文牕開晚春  
高花亂蘂驚衰目徘徊盼久都忘坐常見此花無  
此大蕃衍應緣宅土腴遠條直拂飛鴉過君家德  
產不可荒孤生今遂能擔荷人世榮枯豈偶然花



前不醉誰能那

立夏前夕飲盛宅步月出城不得宿禹長家  
再到看花地還同縱酒人興來堪盡夜坐久漸辭  
春羣少聯雙壁孤光湧一輪只愁更漏促駢出  
城闈

夜市尋常月更深在客衣城嚴不啓鑰火轉別投  
扉露砌人相問風枝鳥乍飛可堪垂老日蒼苧送  
春歸

送李久菴入都

閨月江城碧樹深舟船關口係離心長安若賣長  
門賦借問文成直幾金  
金星不避日車懸玉女潛踪后土堅莫待歸途衰  
草遍炎風荒驛少人烟  
愛弟天邊侍從臣哲兄初踏鳳城塵金閨玉筍飛  
揚甚何計堪留遲暮人

史卜周宅看芍藥

歌呼把菊曾他日暄暖逢花復此辰映幕鮮妍纔  
過雨分叢爛熳豈爭春年芳不歇青山宅夜色全

欺白髮人猶有半開三數朶約余閒步就苔茵

奉寄承德公蔚生先生

奧府青天北神臯紫塞東分符先庶尹報最冠羣  
公玉几名初記金閨籍久通麒麟原在閣仙鶴始  
離籠自此班行峻由來稷禹同職司承御幄心貺  
比彤弓海縣千山外恩波八載中操持惟過儉饑  
饑轉如豐屢顧膺殊眷頻嗟角兩雄竟無溝瀆血  
虛得錦爲幪手贈朱提白顏霑碧酒紅都令寒谷  
煥未怕曉烟空妙譽身滋愧榦材賦少工屏營情

脉脉遷擢恨匆匆暮雨關城別秋燈客路窮五霜  
潛屈蠖萬里背飛鴻陵邑邊沙月王畿絕漠風曆  
新花不見春盡雪纔融每共郎君語深憐物役攻  
水鄉稀稼穡圭竇盛蒿蓬跼伏聞嘉弊歡欣奮薄  
躬官方疇昔懋吾道到今隆恰喜懸弧屆因歌感  
嶽崇他時親獻壽再頌保釐功

題劉玉介像

子端調請余題

往者寒天文酒會令弟齋頭誦清製未識君面把  
文章醇古獨有西京氣明年朱夏來作客始與先

生快投契步履端詳言論偉風規肅穆時賢避招  
呼郭外蘭漿移手折芙蓉席閒置其日炎風頗蕭  
爽看山又上棲靈寺別後江天會面稀屢謁名場  
各思憩俄聞竟作道山遊積水柴門照垂淚絮酒  
炙雞慙闕略脉脉心傷十年事今春閏月傍蕪關  
相逢令子斜陽際詰朝訪我卷軸隨展看面貌先  
生是含笑渾疑向我言神明不共形骸逝君今有  
子讀父書汗溝血赤追天駟題像惟從父執求果  
然善繼先生志

劉瞻麓席上飲離支酒索詠

楓亭憶昨扁舟到時過無繇啖荔支忽聽高齋催  
換酒頓霑佳味許題詩年華老去嘗新少閩粵天  
深索寄遲莫向燈前恣傾寫獨應脣齒異香隨

同禹長俶載過張虞廷

城東張翰宅近市亦蕭疎細雨三人到丹花四月  
初老身容易臥酒病獨難除坐把商丘集從君借  
此書

遼海何年別雲鴻萬里看兵戈連塞上書劍下江

千小閣方清嘯薰風尚薄寒日沉呼舉燭莫是照  
盃乾

一瓢行和李大村

閔敕修在東招飲舟中作

閔家兄弟劇作惡開宴爲監咨虐苛橫驅坐客入  
醉鄉晴川白晝人婆娑兄臥一彪弟臥虎把握科  
條索大戶咄汝醒者何誰人巨瓢飛墮爲吾舉李  
生手中茗椀忽自翻起立滿引更不言壯士合取  
彘肩賜狂吸疑挾鯨波奔老夫顧之色然駭是何  
坳堂納江海偶然一發竟稱雄此氣再鼓將無殆

歸來自賦一瓢行夸詡豪蕩使衆驚孰欲勇者賈  
而勇定是君家似舅甥

謂解直章解方學雄飲故

戲之

焦山老僧行

半崖

李生嗚噓向我笑口述焦山老僧話話我滿面酒  
汗手可涕彷彿流泉落春醪我聞此語莞爾又憮  
然借問人生自古誰百年當時半崖開口道我頗  
矍鑠其後幾日儵忽遷化隨江烟君不憶海波亭  
前翻急雨饑鶻飛鳴日重午到今三霜彈指閒又

見蕤賓風物驚羈旅同遊程載錫我弟王勿齋兩  
人眼前落托無好懷滯淹荆扉與白下相思安得  
長相偕存亡聚散非細故會且拋却吾唇去幸尚  
周旋忍負渠黃河可注直須注生方企脚笑我真  
貪癡酒有何好卿嗜之公但未知酒中趣疾去俛  
首堅坐三復陶家詩

李謂大村

家山公向李詞臣借焦山松寥閣住送之兼

問山僧尋上

李子山腰宅君行好寓居遠天垂海盡夏木映江

疎俯險窺崖鶴迎潮接網魚舊過支遁宿名飲近  
何如

李詞臣招遊郊園二首

欲就閒園醉須憑勝友過酒闌行落日船小得微  
波聽曲紅橋住搖風碧樹多不知汗萊地能否發  
圓荷

遣興還須酒愁時且放歌旱雲空蔽日濁水不成  
波故舊思難斷伊涼調苦多泉源方在望洗穢與  
誰過

贈李五侍臣

藉甚龍門彥聯翩雁一行無雙俱國士第五似何  
郎磊磊星分位温温玉有光大庭會早對妙譽已  
爭揚奕葉榮仙李同根發豫章壯年誇旅力初度  
逼端陽斗帳調琴靜萱闈扇枕涼尺書標錦字尋  
句入奚囊老作江鄉客來傾令節觴偏看白沙上  
競渡亂銀塘

題呂仙像

髯者誰聞風客關中逸八十三天遊戲還行向人

問稱落魄千杯萬杯長恣意白雲之鄉不隔尺背  
上鋒腥鬼物髓筐底花釀洪鑪雪往事祇空聞畫  
手偏留迹而今相遇枯旱天夔罔兩螭橫奔突鎖  
雨緘雲據九霄請公爲吾拔劍擊蕩滌氛霾沛大  
澤始信先生有道術

贈李六詞臣

憶昨道思爲棲止春闌柳巷逢吾子脫然高齋借  
我居老樹閒庭落行李周旋百日別而歸燕沙吳  
霜雁再飛去歲經過又成約今來聚集還多時君

齒小我二十七容顏豐下才氣逸萬里健翮摩秋  
空三峽崩濤縱文筆張筵促饌旬幾迴清襟老懷  
相對開月透松梧拂床臥雨深塗巷挈餅來余也  
衰晚生事拙譬若調饑度寒冽與羊謀羞狐謀皮  
牢具裘溫望終絕雉噫蟬號多苦辛愧君記憶吟  
向人芻米多爲客庖繼藥物兼資旅食貧男兒雄  
俊眼中少夜光龍劍非常寶異日庸勲在海隅如  
今度量軼江表君不聞留侯之生感弧星四方有  
事遲經營會際高明火輪赤卽看遠亮天雲青

贈金沙于西麓歌兒三絕句

畫燭芳樽暑氣澄珠喉金管各呈能曲終定被風  
吹去散作天聲徧廣陵

多謝深杯作意持微風庭院最歡時此身已是柯  
亭竹那得憑君素手吹

幾人真見比紅兒夜夜文郎度曲遲今日空江乘  
霧去何年再有斷腸時

林蕙堂集送孔博士東塘還朝梁翰林藥亭

歸南海張處士南村反白下

太息家園浦溲隈曾迎玉節駐城臺歸墟雪浪東  
瀛隔改命輶車北極迴驛路正悲班馬去風江又  
惜兩帆開勞臣羈客無窮思并入離堂濁酒杯

七夕抵寓作

郡城前月雨偏零水國高天喜却青遠別故人逃  
九夏獨來孤館看雙星年衰服散清朝臥酒斷傳  
更永夜聽今歲秋登新穀賤滄江猶感未歸螢

過李文源寶香堂

浹辰孤館臥相憶幾曾來病起秋城午人閒花徑

開因貪斜景坐不到晚鐘迴明月月明夜將無把  
一盃

秋社朱其恭招集

八月五日大作社老夫病起來追攀秋潛西極避  
殘暑雁隔南雲悲遠山高隴稻梁已蕭索上流波  
浪空潺湲風前藏跋勸人醉露下霑衣容我還

前民來宿

緩步巖城闔開扉短燭然忽思霜夜醉重得旅亭  
眠慘淡陪高會羈孤到暮年明朝白沙渡江月向



誰圓

中秋李詞臣齋中看海棠

雨盡披雲幕烟沉下日車  
小軒閒遲月陰砌晚垂  
花開在天香裏秋先露  
菊斜未來腸已斷令節正  
懷家

李詞臣相迓

念我足無力雨中籃筍來  
老病一朝減笑顏終日  
開看人作大字薄暮試深杯  
不爲夜少寐誰拚茗

芋迓

韋華在坐

夜寐果然熟功須任酒論  
一涼初過雨回首忽驚  
魂秋野生黃葉君家富綠樽  
祇應防盡醉老骨幸  
能存

劉瞻麓生日

人生五十驚心過我記逢辰  
懶賦詩君小六年今  
亦爾秋清八月此其時  
庭闈北面椿萱色池館西  
頭桂菊枝老去承歡難  
並得殷勤多進手中卮

村居八首

暫反塵中轍還登郭外舟  
湖天傷北望海水誤西

流老骨不無病此生何所求樊籠雖日設患豈到  
輕鷗

稻熟家初喜秋高穫未多豈防噫氣作無奈厲風  
何落實隨衰草成秧動淺波寒霜來不緩嗟爾亦  
嘉禾

心力疲酬酢田園恣晏安蟹筐傾日落雞柵減宵  
闌一飽神俄倦羣生骨未寒終須求佛理寬假過  
秋殘

曙色到昏暮小窗還讀書老懷難強記倦眼過成

虛失學頻年外傷神久客餘誰容謝塵務重與閉  
門初

東臯一茅屋俗物眼中稀砌葢登堂語隣雞借樹  
飛暗窗添夜燭寒事近秋衣便合長年住孤帆況  
早歸

去歲經時約扁舟問顧村霜螯僧餉客梓樹僕移  
根木塔殘秋寺風藤夕照門臨流一長望歸鳥自  
飛翻

可怪今年鴈霜前故不來絕知南土好未免北風

哀去住防贈繳飛鳴羨草萊幾羣先泛泛川月荻  
花開

舊業餘何物虛堂置此翁人言聞處少天界望來  
空齒髮羣兒笑寒暄比歲同誰知頻顧景往往見  
飛蓬

草堂讀書有感

晚年只合爲農去野外風光遠俗塵客舍賣文空  
作計湖天橫櫂久無人蛩依短砌情如舊蟹占常  
餐味屢新原是伐檀高隱地敢忘躬稼負先民

空庭兩柏出垣蒼殘日迴風暮景光野岸雞聲來  
喔喔海天鶴影去茫茫老思勤學何心力貧望開  
顏此稻梁少壯瞻依無限事夜分爲夢到繩牀

贈吳雲逸

平生寡面交所期在真賞託彼山泉深鑒此曦月  
朗新安鍾靈秀昔哲盛標榜遠近同客途風流雜  
塵埃四載識吳郎炎歊颯秋爽論文心孔開得句  
林樾響生非本朝外志軼羣輩上二三老遺民傾  
懷罄所仰我昨浮空江累月笑虛往驚飈卷層嶂

舞雪迴急漿，不待歸計無。白晝雙目瞶，告訴走奚奴。  
遺金慰飄蕩，今春來旅舍。局促不殊曩，感君更厚意。  
委曲咨鞅掌，吟詩歎路窮。發興愛技癢，垂橐施何厭。  
臥疾顧真枉，高秋有稻梁。野色餘莽蒼，暫反故園扉。  
再舉重湖蔣，天清眺西南。如見夕宴敞，君年甫三十。  
壯節於此昉，男兒七尺軀。自古能參兩時危，必撐拄俗濁。  
須滌盪僕本疎迂人，馬齒況已長。絕無經世情，獨耿凌霞想。

寄黃孚菴

筋力吾衰甚，烟霜客思繁。今晨逢數雁，嘹唳過衡門。  
章武書難得，文翁道自尊。故人高燭下，連夜幾銷魂。

忽忽中惆悵，吾生晚計荒。雨稀風轉怒，米賣價才昂。  
齋貸供兒女，支離顧景光。又牽人事去，叢蕙鎖茅堂。

古稱君子澤，五世尚難湮。積學悲吾祖，希踪少後人。  
一生獨詩句，千載爲傷神。可奈霜飈急，無心便轉春。

向寄高齋臥深愁遠路歸老來思戒得時過失知  
非課僕秋乘屋留賓日典衣寧親憑愛壻傳語到  
庭闈

陳伯升金禹長來

客散臨高枕船來泊少城故人空道姓老婢不知  
名邂逅無非事如何有此行殘秋收米價敝橐尚  
堪傾

選味厨雖辦登盤饌不華愧吾居小縣拜子恕貧  
家犄角朝朝奕燒燈夜夜花巡檐忽惆悵未見吐

蘭芽

異縣逢兄弟深堂廢主賓狂呼驚小婦笑問到何  
人飯煮車螯滑羹羞蔣角新不知衣色暮酒面日  
生春

未滿十日去瀕行更不留我將投客舍君便放歸  
舟路絕驂騮騁身兼雁鶩謀已知供給薄地主莫  
深愁

臨發枕上作

斷酒知寒漏聞雞逼曙光幼兒偏戀父老日更離

鄉一飯年年急三冬夜夜長何時遂疎嬾倚杖待  
春陽

上韓慕廬學士

平生耻作朱門客海內惟公嚮往深方駕文章誰  
敢道橫驅今古直須任雲中極目稀鴻舉日下流  
聞有翰音一臥江天彌望重高松千丈遠森森  
鴿原芳草過青春先後驅馳犯軟塵馬尾詩成憐  
小弟龍門公去見何人垂頭逆旅驚寒早藉手名  
僧啓事新不仗吹噓到韋布誰知愁咏最酸辛

送別東塘博士

清霜下江城饑鳥亂庭樹落葉何蕭蕭客子驚方  
曙王臣東魯彥三歲南邦住下民正其咨浩蕩天  
垂顧司空未庠績猶殷九重慮波濤送旅雁蘋藻  
翻羣鶩今年雖少雨秋堤上流注大澤千萬村再  
寬鯨鯢路公昔想平成疏鑿煩調度相逢在荒縣  
命酒寒雲暮我拂燕齊塵習尚已旁瞻軒后持威  
弧寥廓力牧助朱門劇噶沓炙手紛馳鶩誰非聖  
者裔心惕兩目瞿反旆謝飛騰荆扉復吾故從公

道問學妙理遺詮註抗懷太古前深領繫表趣惆  
悵職匪專謨謀莫能布枝官溢幕府徒克折腰具  
往來犯風雪功效如毛羽以斯但棲遲經過積文  
賦海濱老蒼人日夕闔空寓金盡典琴書裘亡索  
棉絮六龍駕青旂拜舞臨關渡寵錫出御筵豈曰  
非榮遇瘡痍尚乘運罪悔難全除何時台輔上歛  
見猷烈著野老惜分攜益耿狂瀾懼烟中眺星輶  
又傍黃河去

李詞臣久于招同潘霜栴丁柯亭諸子集春

暉樓劇飲分韻

我從春首來爲客百遍追歡在此間今夕獨嫌無  
好月肅霜都已變寒山星河流轉更將促監史煩  
苛僕不閒均服徵褰謠滿市深憑一醉解愁顏

贈鄭孔嘉

我來何曾廢苦吟獨有贈君詩未作無寧君謂實  
生我伏枕疋羸竟忘昨自挂春帆別茆屋便擁羈  
愁住江郭朋交饋餉情轉傷車馬逢迎氣尤索柔  
毫在手默經營短髮搖頭行寂寞對客踟躕慎發

唇被酒摧藏坐摩脚榴花開殘一反舍流金炎火  
俄薰灼清簟疎簾那乞閒羣書堆案誰能却越羅  
蜀錦疏布褐裁剪機絲恣揮霍低垂流汗力更無  
我弟旁觀浩嗟愕精力原非少壯時鬱蒸沈復頻  
銷鑠食飲不戒臥襲風水火雄猜元化濁會當關  
門且養疴詎宜旅亭更酬酢七月十六日之夜涼  
露月底潛相薄詰朝臆痛類凍凝俯仰反側形靡  
託蒙君顧我診我脉直窺癥結理不錯疾寫禁方  
催火爐細辨中經活維絡破陰絕陽色卽廻滯腸

浣胄胸全拓因言此病所由生浩浩心神何束縛  
三焦已苦烈燄然一泓莫遣泉源涸急拋千慮散  
百憂據藜困石將無藥感君至語增慨傷似我餘  
生自戕虐卽今病起又况瘁幾時懸解真行樂深  
負規箴淚欲傾每憶因依意彌惡莫向秋堂歌此  
詩恐有繁霜拂衣落

送程載錫返新安

飲汝酒送汝行寒風獵獵霜始生汝今別我往何  
處碧嶂清江鄉縣去男兒久客歸亦得看汝愁顏



別有故先世宅兆臨屢屢當年營建心力疲豈虞  
青鳥術不穀等觀石槨三年爲三四曾玄邁艱否  
或老未婚婚之子積居理筴非所長途遠計拙聊  
復爾百金偶向他人賒賤取貴出何爭差湖湘興  
師估舶隔鹹鹺拋擲如泥沙無何賊平價依舊今  
時肥腴昔時瘦債家擇肉但逐時十倍九倍誰蒙  
宥平生骨性本傲岸兀坐忍尤還攘詬七尺之軀  
天地間永念涕淚紛闌干先人五櫬未入土改求  
窀穸良獨難年幾四十無血胤蒲柳先落髻欲班

未知宗祀得不隊飲泣且歸省故山我聞此語心  
不憚銜觴脉脉生愁色忽思人生異庶物徒手偏  
能致鼎食時來一旦誇身強不見里人程與方汝  
姑努力埽丘墓堪輿之說多荒唐酒闌只道夜纔  
半列宿已墮踈鳥翔

方鎔在招飲西郊草堂

慨想多時真嬾絕經過此日最心降近來賢主誰  
能及一帶名園未有雙天外鴈都辭雪磧酒邊人  
半隔風江老夫忽健如黃犢脚旋亭臺手拓牕

送吳雲逸歸新安

輕裝昨歲空江下雪後南關獨訪君  
短日深宵仍臘月高檣柔櫓動寒雲  
梅開早向山中見猿嘯非從客裏聞  
苦愛黃山老藤杖攜來未許過春分

庚午立春己巳臘月廿五日也自名伯發船

枕上作

晴湖行曉船薄衾動微月清霜亦以零  
鳴雁竟先發初冬來郡郭歲除反家室  
四序更故新暮齒驚倏忽老至心易弱  
途遠跡難越客牕多曙燈硯北

植衰骨沉思在捫天永歎屬放筆復此一載去何  
曾百慮得風物俄芳菲雲霄失冰雪良圖信有懷  
撫枕循短髮

除夕

歲月隨羈客冰霜反敝廬浮生吾暫住賤日爾應  
除曆轉窮陰後春蘇閉蟄餘難將衰謝意筵卜問  
何如

甕酒猶浮臘檐花已弄春房中非匹婦畫裏是雙  
親逝水滔滔去流光浩浩新三霜周甲子預恐白

頭人

西齋庚午詩

興化王仲儒景州著

江都閔長虹曠齋選

元日

童稚喜年新衰老傷曆換春生倏五日澤國無冰  
泮自餘白屋煖猶爇紅爐炭拜起力不勝肩背盡  
霑汗陽管何早吹農占雜水旱昨厭守歲酌從俗  
強飲半未徹薑食多肺氣驟爲難垂簾坐虛房往  
事潛搯挽

張石樓母盧太君生日歌

蕪城冬杪逢何鐵向我索詩壽張母爲言母也靈  
芝質早歲歸爲京兆婦京兆所至人謳思越鄉俎  
豆今不朽明德兼資賢內助身貴針繭日在手夜  
課兒書費燈燭朝先婢作勤箕 衾錦殘紅甘覆  
牀園蔬未綠催耕畝國與冠帔雖顯榮家餘荆布  
必慎守霜鶴分飛碧海寒華軒輟駕金烏走長成  
奇毛特殊衆培風所積風良厚偶然六月曠搏扶  
不道青天背難負春明啓蟄宜看花日暖啼鶯待

穿柳是時母辰滿六帙願得新詩佐醞酒近來江  
關妙詩句指數陵亭北淵藪揮翰須君逸響奮倚  
和勿聽諸公後我昔曾登京兆堂鍾郝音徽重回  
首心知何郎言不妄况復張君是吾友常怪世人  
壽其親大書高官著屏右文辭波靡更腐臭自謂  
寵光亦孔醜京兆有子識重輕求詩獨覓支離叟  
此義千秋萬歲相傳爲美談而母壽與同悠久

將入郡風甚不行搢諸酒伴

沉沉夜雨暗傷神歸是三更醒失晨帶酒迷花偏

有分西風南浦又留人

盛先振兄弟招看海棠

江城春半花無數除却君家定不看一望亂紅欹  
院落兩年斜日倚闌干更深徧遣風燈上酒急潛  
銷夜露寒媚景融融賓客散最宜長奉北堂歡

去年

曾醉  
花下

送閔曠齋入都

江風吹暮春搖蕩中庭樹我思何悠悠客子將首  
路塵沙浩無垠策馬京華去候暄謝冰雪裝輕便

馳騫願及朱顏時早奮天衢步歲晏方發舒不如  
守蓬戶

生也實華胄性鄙年少游蹀躞怒馬蹄細軟千金  
裘春岡一脫轡迅如快劍抽此豈不豪俊而匪我  
所求激昂在古烈龜勉希前修修名誠可慕不立  
心煩憂

文藝會逢世詩歌乃適已獨坐淡掩關靜求風騷  
理俗尚善流從羣言紛自喜與之均性情陶冶蓋  
有以微妙有時來相與契本始手持一卷書果灑

狂吟恥

我昔遊薊丘未與子相見定交前年冬流光迅飛  
電論文已浹歲心知豈云面嘗來兼金贈復卷鮮  
衣薦如今旅病中君行何由戀脉脉獨傷懷誰謂  
金石變

粲粲五陵人揚策爭道驅逢迎各自婚折節乃良  
圖長揖大將軍黜也腐老儒直枉計尋尺甘效轅  
下駒汲水取清泉采珍取名瑜君臨榮進地慎保  
千金軀

因趙漢水歸附家書

憑君數紙寄荆扉多病江天旅思違筋力過衰經  
歲減風花向晚逼春歸閒庭不到虛明月高枕頻  
移失曉暉謝埭東頭烟水外孤城隱隱片帆飛

羽菴上人相問

海縣霜秋別風花儵隔年孤亭嬾問訊小極竟沈  
綿報謁深虞晚扶行尚不前幾時身稍健來叩遠  
公禪

與興教大安禪師

少小依禪寂分攜有歲年十尋雙樹老方丈一燈  
然自顧成何事真衰劇可憐江鄉春又暮緩步訪  
彌天

遣懷

春心在柴荆舟子促晨發帆張風力微稍稍亂素  
髮到來愧賢主灑掃軒牖揭栽花間梧竹取次有  
清樾未暇覓朋交相問已不絕牽連歡場入酒懷  
復蓬勃人衰榮衛乾樹老菁華歇中傷忽無端臥  
疾遂踰月

八載遊天南翠微遇日者爲余細推步休咎頗直  
寫我生叢利金得火始傾瀉今年運度善獨病此  
維夏洪鑪燄初然未輟寒流灑二物方馮陵微軀  
困其下

暮星蕩微氛瀟灑晨窗雨離離中庭竹苞蘖漸出  
土移種曾幾時舊植何村塢春雷來年動勁挺必  
可數我老但依人歲歲在羈旅根柢苟不絕時至  
英華吐生無得力兒幼者尚需乳今昔傷我懷一  
燕低空舞

于懷鍾靜茹叔姪過訪詞臣攜酒共飲

微疴寂歷看春去堅臥頻仍向午餘戶外忽聞人  
語熟愁中相對老懷舒顛狂雨夕重拚酒跋扈風  
江早上魚一過炎歊筋力健就君高館眺南徐

潤州諸君相望甚至於陳維其歸作此答之  
兼訂後期

經時欲放三山棹閉戶俄驚九夏初舊約逡巡孤  
異縣殘宵惆悵倚前除年衰敢附搏風鳥酒病長  
思跋浪魚秋氣漸高須會面將詩遙抵過江書

贈別吳侍御巢薇

新承驄馬駐蓬蒿爲道懷歸旅夢勞款語未分蕭  
寺夜離心先卷大江濤邾城遠信雙魚下蜀井清  
吟片碣高堆案舊編方歷亂銷泥獨自感頭毛

金沙于西麓之歌童文瑜去年在李祚源家  
爲之沉醉頃又來西柯其恭二朱子招集  
病未能往

去年寧壽堂前月聽曲魂銷爛醉歸戲謔最嗔翻

汗滓

文瑜酒余其恭  
竊投以魚汁

歆斜不記出城扉春當多病



爲歡少人正相思會面稀欲就華筵尚無分憑闌  
西望彩雲飛

與大村

聞吾客裏長拚醉恐促餘生迴抱愁衰日到來身  
是寄好春歸去病還留千年遼海吟仙鶴一笑齊  
臺話爽鳩前夜月明貪看久獨醒輸爾對滄洲

魏八金大韓二來飲用醉白韻

江魚入市鮮風日復暄妍病起驚春去朋來廢午  
眠相看白髮叟恰有青銅錢醉發華年思如調五

十弦

與喬石林

三年石佛樓邊路船艤荒河暑濕時冠蓋驀來驚  
會面酒杯淺把坐論詩長安自昔浮雲滿晚計如  
今閉戶遲丘壑寄懷曾少日衰容君見撚霜髭

贈李詞臣

烏几高齋坐兩頭讀書聲出小窗幽城陰乍散梅  
天雨江月遙懸桂館秋事在華年應早立交非同  
氣豈相求日來詩律談尤細新句緣君契冥搜

送趙倚蘭之無錫

宿雨初收綠樹齊巖關將度問梁溪人留東郭移  
時坐鶯過南徐滿路啼歸棹可能同蕩漾清尊曾  
許落提攜故園薄暮招尋慣把手臨風思總迷

五月三日柬李祚源

湛湛江波動遠天映空絲雨散庭前懸蒲餉黍仍  
今日顧曲迷花是去年晚節愛君情脉脉衰容作  
客脰肩肩倒冠未及斜陽裏酣眼城西看畫船

送潘霜樞北上

迴野蒸霾雲蘊崇難飄蕩永日旅亭中煩憂逐時  
長閉關養微疴吾道在草莽素髮已亂垂榮遇非  
所想早魍走中原君行欲焉往

相逢常拍肩暫別必攜手連旦心不怡念子遊當  
久今秋大校士駿乘爭北走胡爲耕釣徒亦復隨  
其耦莛楹厲西施物論方雜揉能如坐江天日飲  
毋何否

昨讌張郎宅檐雨灑庭障惜君爲此行毋乃昧所  
向持觴淚交墮起踉言無狀自孤罔極恩未買青

山葬親故滿京華庶可相馮仗良非凌空翼漫擬  
隨風颺

遵陸憚觸熱乘舟偕同心汶水判南流上閘苦滯  
滯况聞兩厓峻中但咫尺溪晨征忽無路却覓槐  
榆陰秦郵與山陽名醞可酌斟滿沽貯鶴首長日  
酬高吟

軒后遺玄珠使智索其寶離朱將喫詬不及象罔  
好人生異所遭定分由大造得喪豈偶然世態厭  
機巧回首三年前出處太草草因君傷我懷決計

湖濱老

生日雨中漫筆

一笑辰安在蕭然倚客扉年猶標故曆生卽犯炎  
威六十漸相逼九齡何但稀朝來仰天祝惟有遯  
須肥

何世曾前度當年亦暫生乾坤人又老家國感難  
平去去千端事沉沉萬歲名西風凍雨集也作怒  
濤聲

我弟傳書到輕舟昨日來新禾隨地發宿蕙幾枝

開累月聞衰疾孤亭見酒杯晨朝頻北望曾否泊  
湖隍

李氏好兄弟邀人殊可憐遂關空院去淡坐畫樓

邊刺眼春暉字

李之園樓  
名春暉

垂頭夏至天涼廳何自

到爲我一凄然

是日侍臣諸  
兄弟招集

與葉桐初

茶村壻

涼風一夕散沉陰寂寞荒亭客尚尋記得十三年

裏事同吟微雪下更深

戊午冬茶村與余同  
客天寧桐初適來

襍被衝寒渚水凝梅花漢節只依僧岳陽旅殯何

年瘞淚盡乾坤老杜陵

黃金臺畔暮飛沙宣武城頭秋吹笳我住斜街纔

一月四年君未出京華

羅三

亦  
高韓二  
白醉

並交歡兵火同哀骨肉殘今日聽

君揮淚說又教老眼不能乾

生理俱從研北論江帆明日下吳門主人大好吟

詩在看到猿啼莫斷魂

青岱黃河世共知細流土壤漫貽嗤篇章早共荒

江叟

謂前  
民

料理詩人萬古垂

送李詞臣省試

艇子西風醉夕暉朱華翠蓋倚芳菲乍聽畫鷁臨  
江待如見名鷗駕海飛在午爭光君定是尊甫以甲午舉  
逢辰有日我全非冬來壽母堂前舞身被瑤宮第  
一衣

送于懷鍾之任靖江

歡場凍雨聞君發被酒吟詩遠贈行郭外景分黃  
歇浦樽中香出闔閭城論文故里原無敵曾先任鳳陽  
近海高江倍有聲欲共李郎搖槳過早求名飲向

諸生

謂詞臣

題李子修牧牛圖

李子吟詩風格清向余開卷說平生曾無一事堪  
聊賴去傍春田叱犢行

張芳傳出守鐔州余向遊其地詩以道之

送君迢遞上閩封諫果名柑處處逢雲出九仙迎  
五馬城開萬嶺控雙龍居人風俗舟航薄太守衙  
齋磴道重曾聽灘聲登傑閣涼秋心挂到天峰

送朱其恭入都

今我憚行遊奮身脫牽迫早年多塵沙屢送北征  
客朱生名公子抗志文章伯浮雲軼絕足培風負  
長翮迴翔愛天寬馳驟憎地窄從親來東楚苦厭  
吏事劇鳧鳥忽不飛鯉庭尋亦隔回首踰武林所  
遭判順逆欲泛江漿還那將百憂擲杖苴腸已斷  
弄翰意或適平生敦交歡一片心匪石揚州舊城  
中酒人在幽僻追隨蓋累歲笑語無虛夕談詩鄙  
儂薄道古矜風格世自有周行昧者乃局踏舍探  
江海原汗潦爭餘液枯楊絕本根其華豈堪摘吾

賢何磊落若屬應辟易曩反池陽船相逢孔融席

謂東塘  
博士

刻燭詠各成隱几句方索因知襟期別歟

見追琢益頻仍換星躔聚集忘月魄龍虎鬪秋清  
會通賓與籍寧安貢舊鄉輒擬踵前迹驪唱俄在  
門去去凌紫陌故人蒲柳姿晚暮頭盡白逐隊信  
非偶浪出溪悔昔臨分眼空懸感遇扼猶搯京師  
正勤雨冀野頗無麥雖蒙承平福恐疎撫理責山  
且拋菊妃亭莫懷蠟屐早圖登丹陛直陳匡時策

揚州酒人歌

缺月不滿下弦夕落日不上西山隅人生鬢髮儵  
變滅今者不樂胡爲乎眼前何物堪與朋友共苦  
乏名姬寶玦貂襜褕又無鸚輪控紫燕聳身騰駕  
超泥途惟有一尊酒可以相覓爲歡娛有錢把擲  
酒家胡無錢便典衣裳襦那問明朝竈下米與芻  
武川豪客昔未到揚州故自多酒徒開軒促饌數  
琺過先驅發號監申驅四座拱聽笑語寂彷彿偏  
伍隨啓肱更番張燭何夜無江天一旦酒星墮字  
曰其恭其姓朱朱慎浙江武義人揮毫氣已犯寒兔倒觴

勢欲迴陽烏會同諸公恣遊戲智類炙轆兼轉樞

往往大醉莫記誰家廬吳興太守吳聽翁吳綺衣冠

古野顏色愉引端送難行巨觚蔣叟前民尤嗜飲

蔣易纔聞布席忘憂虞連卮急注心神舒祚源文源

好兄弟李衍李潞神仙中人飄白鬚家醞芳冽卑市沽

寧壽寶香二李堂名日高會科條手執疇敢踰府西喬

成侯喬美瑞郭南秦來劬秦之俊孰爲整暇孰卻略孝

廉得勿甘小巫謂來劬西柯紫陽喬朱紫流香堂上羅

羣書把杯劇談必盡興醉則發唱聲嗚嗚朱秦恰

望衡蔣喬亦連衢歸路最喜相持扶我兄蒙谷老  
岐方渴虹汲汲賓筵初放蕩恒被苛政束涓滴屢遭  
酷吏誣勿齋我親弟熹時時闌入狂叫呼干令向  
人嗚噓笑少焉腹滿形模糊其間量非大戶絕狡  
獍居然突將提兵符縱橫無奈喬東湖喬三年我  
來新城住片紙趣召如追逋頻仍酒病頽賤軀頗  
聞糟肉更堪久且休早計化土爲酒壺朱生今忽  
騎馬入京國吳公昨已泛艇投菰蒲使我對酒心  
中孤曼聲長嘯當吳歛便請文選樓邊朱二玉妙

寫揚州酒人圖將圖與歌流傳到身後借問作歌  
者誰與不見圖中白頭人捉筆爛醉高吟王仲儒

爲鄭蕃修題像兼贈

平生重投分所愛經奇人求之絕難得邂逅或以  
親上元程韋華磊落軼輩倫初交皮相脫久對中  
懷申遂攜同心友歛見先古民高風颯太虛下掃  
客舍塵遷甫瀘州及秋士新安洪次第結德鄰邈  
逢榮陽秀已送殘冬春爭知名公後賞歎佳句新  
端居飽蔬食松聲熟葵蘋腥羶可厭惡豈曰希勝



因麪藥不恒須筵秩乃入脣驟聽吞吸促恐澀龍  
門津終夜爛漫醉豁達興蕭晨余嬰沉湎疾右搨  
屈不伸邾莒信僻陋敢敵齊楚秦君齒尚強壯著  
述驚等身清虛方日來闐寂氣益振將栽萬梅樹  
鐵幹紛輪困花時拓窗坐冰雪寒無垠香來意云  
何此際妙入神羣芳今安在山麓還溪濱先生笑  
展卷請余觀寫真

發郡舍

客久治行勞如辭室家去衆星殊未稀飯已天始

曙登車越廣陌臥者猶夾路炎蒸闐闐隘况乏禦  
蚊具當風且揮扇侵曉竟霑露我患腰脚衰寒暑  
慎防護旅亭旣疏達舍下有北戶觸目中慘悽人  
生豈同遇

舟滯

毒熱樹無聲川涂况泥行半年稀夜雨落日背秋  
城去去帆空挂飛飛鳥故輕莫應長作客紆鬱到  
鄉情

余未歸盆蘭盛開舍弟同若淵兩峰槐江楚

珩諸子吟賞見懷和答二首

伏雨江城客辭家春尚寒不應爲別久其奈欲歸  
難懷抱寬烟水風光轉蕙蘭故人詩滿壁炳燭映  
花看

過賞知何日相思得妙吟老來歡有限別後酒誰  
淡醉態輸花見流光費夢尋無由拋客路去住正  
驚心

黃孚菴歸自章武分一花贈之系以詩

仙鳧嫖忽去金臺麗士元非百里才長憶酒人呼

酒對未從花縣載花迴香過翠嶂雲程遠叢傷紅  
蕖露蕊開執友已驚山繭贈高齋休笑瓦盆來

諸老集飲西齋和朱嬾翁

早春爲客早秋歸故里親朋聚集違近日雨暘時  
自若天風杭稻望成圍得錢貫酒開三徑分局看  
棊閉兩扉莫使端居歡不極可聞警急檄頻飛

卞孺蔚廣文屬賦紅綃帕二絕句

一幅輕綃劇麗都盈盈長日繫羅襦不知銀蒜雙  
垂後添得丹霜幾點無

銀幌如何相對垂  
分明紅雪艷春枝  
後堂滿眼纖腰束  
獨有彭宣不許窺

上天行

世人有眼見尋丈  
十載眯却天呈祥  
霜凝霰集建子月  
竟空匹練來西方  
侵凌列宿二十四  
勢壓孛孛橫莫當  
金寒冬殺設此象  
不數蚩尤及欃槍  
其年元夜望舒出  
滿輪赤黝無晶光  
三時滂雨九霄注  
江淮郡邑波茫茫  
孤城小市成巨浸  
魚鼈直上居人堂  
如何咎徵洊以至  
得非再兆馮夷殃  
野老

只愁隴畝沒識者  
潛料戎機彰昨歲  
大星不避日其先  
變現春載陽迴環  
交瑣盡白氣左右  
珥抱朱曦傍又聞  
是冬火螭耀頃來  
側聽尤非常西北  
夜半屢上月或推  
或挽形愴囊人傳  
幻怪孰敢信我目  
親睹焉能忘衰晚  
羞論謬通籍惟願  
飽飯歌時康方割  
其咨厯 睿慮司空  
似禹平懷襄豈知  
海口計未善厲風  
驟鼓鯨濤揚翻隄  
突岸走村落湖中  
藻荇皆萎黃弱鱗  
腹脹蚌吐舌浮散  
水面嗟天傷高禾  
土裂蝨賊盛垂死  
得雨如甘漿猶須  
桔槔

更滋沃坐視斥鹵流浪浪上流無憂恰遭旱何年  
秔稻崇我倉堅臥茅齋正偏側北風有客停烏檣  
相逢問事但搖手侵晨實苦征行忙未省啓明照  
何處朝暉獨自開扶桑諸公善飲幸爛醉僕竊恍  
忽疑穹蒼

中秋飲舍弟處已醉徐槐江復邀過若淵宅

同楚珩勿齋泥飲因思丙寅是夜雨中偕

過唐子子廡元水兩兄今皆沒愴然有詩

好月臨宵半殘樽過巷西露濃真潤屋天遠莫懸

梯昔歲情人醉淡燈聽雨迷歡場回首處催起宿  
烏啼

秋感四首

未殘暑濕自烟霄不道津程郡邑遙去國湖山懷  
入越依人亭館算遷喬老耽日暇田翁話幼夢雲  
歸玉女招余少時夢身浸雲中詠終歲浮沉成底  
事又聽林葉下蕭蕭

茅堂多病落秋風營已勞生一笑中碧酒頻拈愁  
去得青春再好夢來空熟知明且非今日誤信前

身是此翁壓架羣書徒汗漫南華孤對夜燈紅  
紫瀾秋漲碧天昏多事爰居到魯門不趁風颺高  
振翮却聽鐘鼓劇驚魂時違學稼人非小俗濁揚  
波道豈尊崒崒氷山炎火畔向來金石與誰論  
那得崇山策杖躋塵埃衰日竟頽西蒼鷺舊駭浮  
天颺宛馬新驚蹋地嘶節氣陽消零草樹年光早  
甚斷雲霓秋登又失豚蹄望顛倒愁腸付醉泥

示西寺峴師門徒澹巖

秋氣到庭院忽然思故人西風寶巖寺黃葉下東

鄰老宿一以去空樓不復春僧雛今壯大衰白最  
傷神

九日風雨總至不赴旣庭廣文登高之招詩

呈宋公二首

孤城直北海光樓下瞰曾波繞郭流短髮數莖逢  
九日正冠一笑渺千秋川津漸合蓬蒿路斥鹵遙  
侵荻葦洲惟有晴烟增暮色蒼蒼落景動漁舟  
卑栖已慣忘登高愁思長憑濁酒盡日柴荆原  
不出崇朝風雨亦空勞百年多病渾如杜一卷新

詩漫學陶太息旻天艱大澤諸溪水落罷持螯

送喬密之歸白田兼懷石林雲漸

周親姻婭自夤緣把手微霜小雪天大阮相尋俄  
六月仙鄉不到已三年未容粗飯中厨辦早惜輕  
帆別浦懸垂白仁兄尚良食憶渠悽斷海雲邊

漸

謂雲

將行若淵兩峰楚珩琢山槐江勿齋攜酒余

治具夜飲

遂少閉門計扁舟今又行境來皆昨日心惻盡平

生曲轉湖中路迴看霧裏城三冬如見雪酒到莫

傷情

事到治行苦心因話別牽又期良夜聚多謝故人  
傳水驛定孤坐江城非此筵崢嶸數殘曆後會近  
明年

寄阮亭侍郎

風流雲散劇多春白髮尋常省訝新望盡老天空  
倚薄行殘童土尚蹲循學猶瓦注心偏拙儒到珠  
傷術不神眴眼見君台輔上豈能無意道垂綸

贈于大伯揚

春來秋去此年時客子烟帆野外遲  
衰白愧君情眷眷逢人開口說相思

未訪高門病脚因停車先爲拂行塵  
毬場北去無多路望裏桃花不辨津

開年便作七閩遊劍浦龍巖可散愁  
要噉離支下灘去題詩還上雪峰頭

僕老霜髭絕可憐下生兩載讓君先  
紅顏獨向春風駐長醉流霞轉不然

李文源六十歌

今冬仲月少雨雪似欲早作淮南春  
巖風退舍吹暖律黃梅花吐何鮮新  
寶香堂前古老榦滿院垂蔭無纖塵  
冰凍未甘香色劣暄和况乃蒙洪鈞  
宮莎內蕊豈不艷組繡索索非天真  
崢嶸玉曆衆芳歇黃中郁烈誰曾均  
李侯此時坐堂上啓扉授簡方紛綸  
先生中丞令文孫偉哉國寶還儒珍  
風雲奮發會有數龍虎蟄伏焉能馴  
富貴壽善忽縣解惟餘至樂可活身  
我聞大隱隱朝市末流歛見皇

初民雖雖鳴雁密行序髭鬚颯爽俱如銀少憶肩  
隨恣遊戲老度耳順逾情親行年六十六十化蘧  
公千古今其倫自來暢月潔湛熾君家縹碧先已  
醇花開邀醉屬令節九齡百歲同斯辰參差杖屨  
歡就席李吳喬蔣朱王秦先生指客向我笑是汝  
詩中舊酒人

贈別周培風還溧陽

我思投金瀨欲逐江雲去酒病俄乘陵閉閣煎百  
慮秋風海增波寒宵天難曙相逢一悽其歲晏失

暇豫

暮春送丁李

謂柯亭  
久于

驟綱入京周之子興不淺亦

泛青溪秋南北天沆寥文星落何州我甘謝老驥  
千里非所求

節序入凜冬嚴霜久不至長年氣候殊歸客少快  
意如何烟江平俾君別余易燭影搖山樓幾時復  
成醉

贈別于千英

幾回過鐵甕不得到金沙宿草師阡恨

謂生洲  
先生空



囊客路嗟君顏方玉色吾髮久霜華相遇寒城外  
含悽話日斜

贈別狄立人

近關纔艤孝廉船班馬俄嘶東楚天至後晴光曠  
遠道春來樂事稱華年臨文磊落垣星動作字橫  
斜屋漏懸內蕊宮衣宐少俊看君身惹御爐烟  
半載相望江水淡旅亭何意對知音倒冠合埽蓬  
蒿徑脫衷分鐫琬琰金弱翰寫懷情惻惻寒燈惜  
別夜沉沉京華故舊飛騰裏誰念泥涂老滯滯

十二月朔日大雪鄭蕃修相招漫成口號

歲歲冬殘不得歸征裘今日逼寒威滿城酒伴誰  
來問自倚閒軒看雪飛

乍啓柴關數字來衝寒呼我看黃梅坐中只有三

高士懷抱前知得好開

韋華秋  
士渭求

西北山岡雪幾層也思出郭一憑陵鮮車怒馬填  
河下我輩何人許借乘

揚州酒人十二人爲君置閨似留春只應一見長

鯨吸都向江湖學縱鱗

鄭名飲  
不可及

二日猶雪甚寒

隱隱堅冰至荒荒老日徂殘年依郡郭大雪颯羈  
孤詩瘦神難入人衰藥不扶寒淡蝗種絕生計未  
全無

獨立

朔風猶未歇積雪滿庭隅伴我雙童在逢人一个  
無竈邊薪又盡市上酒難沽慙愧寒梅色留香慰  
老夫

別許睂右

青冥高翼忽垂天主客相求總悵然久住嚴風乾  
積雪將歸寒水涸殘年羊裘短似衰翁髮馬角艱  
如做橐錢遙夜微吟報公子暗霜隨月到愁邊

二十四日晨雪已而止然風仍西北向夕風  
緊則歸未有期矣爲作此詩

衰遲心跡太悠悠曉起巡簷憫白頭五十七齡除  
玉曆一年六月走揚州端能爛醉春多興未必餘  
生客免愁計日冰開放孤棹雪風消息荻蘆洲

二十六日雪阻楊莊

金樽錦瑟阿誰樓雪岸冰池此客舟無限塞鴻爭  
北鄉一時飛過海城頭

羈離不奈故園思老骨頹頹強自支較勝逐臣窮  
塞去冰天無際馬行遲

十日流光便立春翻教冰雪浩無垠遙憐弟姪團  
圍夜愁對諸兒話旅人

童僕生憎只憶家爲過時節作年華老夫牽率來  
斯地急雪爭團勝裏花

幾何日夕在春前蓬底思量起又眠莫似劍州山

上住酒痕和淚送殘年

茫茫一白蓋千村立望移時斷客魂豈有神山瀛  
海外麗農方丈是柴門

二十八日大雪阻永安

留滯原吾道凄寒復此年凍雲屯大澤孤日走何  
天去鷁飛真退來鴻響不連寥寥雙岸裏送歲守  
歸船

前夜雪大作今晨又不休密纒遮客眼淡已壓船  
頭水路隨風合炊烟逼泪流莫然蓬底燭照見老

顏愁

打篷初淅淅似葉遽雰雰薄暮寒爭艷多時響不  
聞年殘三數日野靜萬重雲爲報東皇道蒼龍早  
御君

雨雪消蝗子冬暄恐遂無驟飛曾喜躍屢集但驚  
呼水立能寒雀檣蹲不去烏西風夕仍急誰敢料  
前途

乍喜瞻紅日終難仰碧霄曆窮天地閉春邇室家  
遙每歲驚除夕餘生有幾宵計程歸不得先試旅

魂招

只道雲難盡誰知雪易晴日搖荒野色風作遠空  
聲向午背初曝薦辛魂暗驚楊華羞老婦也待津  
水行

身老歡情少途窮恨事多鴻蒙掉頭去列子御風  
過絕地蠶叢道分天鴨綠波尚無征役苦坐穩莫  
悲歌

竟日勞瞻矚孤舟費寢興雪晴人粟粟霜曉木稜  
稜老骨耽依火孱軀戒履冰歲朝應野泊歸去試

春燈

永安除夕

水腹沍難融天清坐北風遠村新令節孤艇舊衰  
翁六十前期逼晨朝此境同盧耽爾何術有翮獨  
凌空

僕去呼徒隸肩輿載我還孤城百里遠一路層冰  
間此際何村岸來時隔歲顏日斜寒又急累汝亦  
多艱

守歲

北風獵獵吹天關西日沉沉積霧闊打破層冰看  
又合我舟知得幾時還

茅堂此際尚團圓獨受凄寒亦任天早信我爲當  
去客何鄉逆旅不迎年

歲去堂堂心暗驚頌花列炬不勝情今宵穩臥孤  
篷底也免燒燈守到明



